

Саяси қуғын – сүргін құрбандары мәңгі есте



31 мамыр саяси қуғын – сүргін құрбандарын еске алу күніне орай қаламызда митинг өтіп, жиылғандар Алаш ардақтысы Ахмет Байтұрсынов мүсініне гүл шоқтарын қойды.

Жазықсыз жаламен азаптап, сол кездегі жауыз жүйе сан мыңдаған адамдармен бірге өлім жазасына кескен Ахаң атындағы алаңға көктемнің соңғы күнінде биыл да жұртшылық жиыналған. Зұлмат жылдар құрбандары 1 минут үнсіздікпен еске алынып, олардың рухтарына қасиетті Рамазан айында Түркия елінен арнайы келген Қари құран бағыштады. Арқалық қалалық мәслихатының хатшысы Гүлбану ЕЛТЕБАЕВА халқымыздың басуна қара бұлт үйірген зобалаң жылдар зардабын сөз етіп, нәубет кезең құрбанының ұрпағы ретінде Хамит ДОСЖАНОВ ақсақал да қиын заманның естелігімен бөлісті. Қазақ жасөспірімдер театрының әртістері сахналық қойылыммен

өткен күндер көріністерін көз алдымызға әкелді.

Үш жүз жылдай патшалық Ресейдің, 70 жыл Кеңес үкіметінің отары болған қазақ халқы үстем елдің небір қанқұйлы әрекеттерін көрді. Солардың ішіндегі ең зұлматты кезең – 1931 – 1932 жылдардағы қолдан жасалған аштық пен 1937 – 1938 жылдардағы саяси қуғын – сүргін екені даусыз. Тарихи мәліметтерге сәйкес 1931-1933 жылдың ашаршылығы миллиондаған қазақтың басын жұтса, 1937-1938-дің репрессиясы қазақтың бетке ұстар қаймағын қынадай қырып салды. Қызыл империяның қаны тамған заманда елімізде 20-дан астам лагерь жұмыс істеп, оларда 800 мыңнан астам асыл азаматтарымыз азап шекті. 1937-1938 жылдар аралығында 103 мың адам қуғындалып, 27 мыңнан астам адам атылған. Зобалаң жылдарда құрбан болған қандастарымыз жайлы шындық сол кездегі солақай саясат кесірінен көп уақыт айтылмай жүрді. Әйтсе де, Тәуелсіздігімізді алып, дербес ел атанған соң, 1997 жылдан бастап жазықсыз жапа шеккен отандастарымыз ресми түрде еске алынып келеді.